



*Rabu, 02 Juni 2021*

**Ogen: Josua 24:14-15**



**Erpersukuten Man Bapa**



Erkawiten ras wari lahirna Pancasila, teridah sekalak pemimpin eme Presiden Soekarno alu tegas ras jelas nuriken dasar Negara Indonesia. Alu karisma si lit, ia nuriken maka bangsa Indonesia bangsa si eragama, lit Tuhan si man sembahen. Kepemimpinan Soekarno tuhu maba semangat ras motivasi man kerina masyarakat Indonesia lako paguh ndalanken jiwa Pancasila.

Josua i bas kepemimpinanna pe cukup medurma, ibegiken kalak Israel cakapna ras ersura-sura ngelakoken kai si isuruhna. Bangsa Israel erpadan nembah Dibata si isembah Josua, ras njagai persadan bangsana jine. Lanai nggit bangsa enda nembah man dibata-dibata kalak Amori, dibata kalak Heti entah dibata-dibata kalak Kanaan. Teriah Josua rilih i bas mimpin Israel, si ibenaina lebe i bas mimpin jabuna. Nina Josua, "aku ras isi jabuku Tuhan saja ngenca isembah kami."

Sembah, e mengagungkan Tuhan i bas kerina dampar geluh, sura-sura Tuhan ipebelin i bas kegeluhen. Janah mereken diri guna iatur Tuhan. Bageme Josua mereken diri ras jabuna guna iatur Tuhan, ipesikapna dirina ras jabuna ngelakoken sura-sura Tuhan. Maka banci Josua rilih i bas mimpin jabu ras mimpin bangsa Israel erkiteken iberena dirina ipimpin Tuhan. I bas jabu ia igelari bapa. Si jadi imam, mabai jabuna ersembah man Dibata. Imam e me wakil Dibata ngerana man anak jabu kerna sura-sura Dibata, janah imam e pe wakil jabu nehken toto ras persembahen man Dibata. Dahin selaku imam enda ilakoken Josua alu mehuli. Janah ndehara ras anak-anakna erpersukuten man bana. Perlukal i bas jabu-jabuta sibabai anak-anakta ras kita erpersukuten man bapa tengah jabu. Gelah ia pe medurma dinging mehaga i bas teptep pendahinna ras masyarakat inganta tading.